



Inatsisartut aalajangiiffigisassaattut siunnersuut Inatsisartunut Siulittaasoqarfik partiit tapiissutaat pillugit inatsimmi allannguutissatut siunnersuummik saqqummiussinissaat Namminersorlutik Oqartussani ukiumut sipaaruteqartarnissaq aammalu partiit akunnerminni aningaasatigut naligiinngissuseq annikillissarnissaa siunertaralugu. Partiinut tapiissuteqartarneq pillugu inatsimmi allannguutissatut siunnersuuteqarnermi suliniutit uku ilaatinneqassapput:

- 1. Partiinut tunngaviumik tapiissutit ukiumut 1 million kr.-mut qaffanneqassooq**
- 2. Qaffasinnerpaafissaanut killiliusaaq atuutsinneqalissaaq taamaasilluni annertunerpaamik qinigaatitanut tapiissutigineqartartoq qinikkanut arfinilinnut killiliunneqarluni. Inatsi 1. januar 2024 atuutilersinneqassaaq.**

(Inatsisartunut ilaasortaq Jens-Frederik Nielsen, Demokraatit)

(Siullermeerneqarnera)

Inatsisartut aalajangiiffigisassaattut siunnersuut, Inatsisartut Siulittaasoqarfiat peqquneqassasoq siunnersuummik saqqummiussissasoq, Naalakkersuinikkut partiit ingerlatsisut naatsorsuutaasa tamanut saqqummiunneqartarnerat pillugit Inatsisartut Inatsisaat allangortinneqarnissaannik taamaasilluni partiimut 10.000kr. sinnerlugu aningaasaliissuteqarsimanermi partiip naatsorsuutaanni kina aningaasaliissuteqarsimanersoq taamaallaat allaqqanani, kisiannili aamma aningaasaliissutit qanoq annertutigineri aamma allaqqasalerluni. Aningaasaliissutigineqarsinnaasullu killissarititaa avaqunneqarsinnaassanngilattaq inatsisitigut pisussaataitaasunit arlaliusunit avinneqarsimalluni.

(Inatsisartunut ilaasortaq Jens-Frederik Nielsen, Demokraatit)

(Siullermeerneqarnera)

Demokraatit Inatsisartuni ilaasortaataitaannut Jens-Frederik Nielsen-imut siunnersuutitut pitsaasunut qujanaq.

Qularutissaanngilaq, uagut politikikkut partiiusugut immitsinnut qiviartariaqartugut, takullugulu, qanoq ililluta uatsinnut aningaasartuutaasut ikilisissinnaanerlugit.

Inatsisartunut ilaasortaq Jens-Frederik Nielsen uani siunnersuuteqarpoq, nunatta karsianut ukiumut 2,4 millioner koruuninik sipaarutaasinnaasumik. Tamanna nersortariaqarpoq.

Demokraatinut pingaarnepaavoq, uagut partiitut innuttaasut takutissagigut, uatsinnut aningaasartuutaasunik sipaarniarnissamat piumassuseqarnerput. Inatsisartunut ilaasortap Jens-Frederik Nielsenip siunnersuutaa tassunga inernerusinnaavoq, Demokraatilli allatut ilusilimmik siunnersuuteqartoqarpat taakku ammaffigalugit. Oqassaagulli, uagut tungitsinniit piumasaqaataamat, sipaarutissaq Namminersorlutik Oqartussanut malunnartuusariaqartoq.

Taamatullu pingaaruteqarpoq, sipaaruteqarneq ima pissasoq, pissaaneqarnerit pilliuteqarnerullutik. Pingaaruteqarpoq, partiit akunnerminni unammilleqatigiinnerisa naligiinnerulernissaat, maannakkullu



ingerlatsinermi, partiinit anginertit salliutitsineq, allangortinneqassasoq partiinut minnerusunut iluaqutaasussamik.

Maannakkut naalakkersuisooqatigiit nipiliutigaat, assigiinnerulertoqassasoq. Tassunga oqaannartariaqarpoq, uani periarfissinneqarput immikkuullarissumik iliuuseqarnissigut assigiinnerulernissamik pilersitsinissassinut. Apeqqutaaginnarporli IA-kkut Siumullu assigiinnerulerneq kissaatigineeraat, eqqorneqalaartussanngorunik. Taassuma malinnaaffiginissaa pissanngatigaara.

Partiinut tapiissutit aqqissuussap allangortinneqarnissaanut siunnersuut taamatut oqaasertalerlugu ataatsimiititaliamut attuumassuteqartumut suliareqqitassanngorlugu innersuussutigaarput.

Politikkikkut partiit naatsorsuutaasa sulii ammanerunissaannik ersarinnerunissaannillu siunnersuummut tunngatillugu, tamanna isumaqatigisorujussuarput. Demokraatinut pingaartuuvoq, kikkut tamarmik periarfissaqassasut, politikikkut partiinut kikkut aningaasaliisarnersut paasissallugu, kammalaasersornissap qanigisarsornissalluunniit minnerulertinnissaanut. Politikikkut partiit isummanik anguniagassanillu ingerlasussaapput partiip karsianut kikkut ikisinersut apeqqutaatinnagu.

Siunnersuut una taamatuttaaq ataatsimiititaliami attuumassuteqartumi suliarineqarnissaa innersuussutigaarput.